

Powšitkowne WOZJEWJENJA

njedźelu, 11. měrca 2012

Čěski film wo jutrach a křižerjach

„Jutry we Łužicy a pod Łužiskimi horami“ rěka dwudźělňny dokumentarny film, kotryž je w léće 2010 čěski režiser Zdeněk Flídr zhotowił. Loni nazymu je so we Łužicy přeni raz w serbskej a němskej wersiji pokazał. Štóz njeje tehdy składnosć měł, sej film wobhladać, je tutu njedźelu, 11. měrca, we 18 hodž. do Radworskeho hosćenca „Meja“ přeprošeny. Tam předstaji so serbska wersija dokumentarneho filma.

Póstny seminar

Třeći póstny seminar w Domje biskopa Bena w Smochćicach póndźelu, 12. měrca, změje temu „Na swěće, ale nic ze swěta.‘ Křescenjo a jich wizije“. K zakončenju lětušich póstnych seminarow, kotrež maja hłownu temu „Mać cyrkej, wótc stat: Kotry počah matej?“, předstaji so sobotu, 17. měrca, w ewangelskej wosadnicy Při měščanskim nasypje w Budyšinje film „Wo ludžoch a bohach“. Wobě zarjadowani započnjetej so w 19.30 hodž.

Zhromadny dzeń za 3. a 4. lětnik

Pod hesłom „Počas“ přeprošuje Dekanatne dušepastyrstwo džěci 3. a 4. lětnika na zhromadny dzeń sobotu, 17. měrca, wot 9 do 15 hodž. do Don Boskoweho domu we Worklecach. Zajimcy njech so prošu hač do wutory, 13. měrca, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždneho wobdźělnika přinošk we wysokosći třoch eurow.

Komplet

Wšitkich młodostnych přeprošujemy sobotu, 17. měrca, w 20 hodž. na štwórtu komplet do Ralbic.

Profylaktiska połnomóc, postajenja pacienta a hladanje

Ambulantna hospicna služba Carity přeprošuje wšitkich zajimcow na přednošk k temje „Profylaktiska połnomóc (Vorsorgevollmacht), postajenja pacienta (Patientenverfügung), hladanje“ wutoru, 13. měrca, we 18 hodž. w ewangelskej wosadnicy na Angeru w Kamjencu. Sylvia Wosky, skutkowaca w socialnej službje chorownje maltezew w Kamjencu, porěči na přikład wo tym, na kotre wašnje měloj so za wšitkich wažnej dokumentaj nastajić a što mělo so wobkedźbować.

Putnikowanje swójbow

Putnikowanje serbskich swójbow do Róžanta budže lětsa pjatu póstnu njedźelu, 25. měrca. Božu mšu w hnadownej cyrkwi změje w 9.00 hodž. Radworski farar, kanonik Šćěpan Delan.

Džěcacy chór za putnikowanje swójbow

Wšitke džěci, kotrež chcedža Božu mšu na putnikowanju swójbow njedźelu, 25. měrca, w Róžeńčanskej swjatnicy w zhromadnym chórze wobrubić, su nanajwutrobnišo přeprošene na zwučowanje, kotrež budže sobotu, 24. měrca, wot 9.00 do 11.00 hodž. na Chróšćanskej farje. Zajimowane džěci njech so prošu hač do srjedy, 21. měrca, pod telefonowym čisłom (03 57 96) 8 87 07 we Worklecach přizjewja.

Swobodne džělowe městno

Caritas poskićuje džělowe městno chorobneje sotry abo hladarki starych ludźi w teamje socialneje stacije w Kamjencu. Městno je njewobmjezowane a ma wobjim 25 hodźin na tydžeń. Štóž ma zajim a chce dalše nadrobnošće zhonić, njech zazwoni w Kamjenskej socialnej staciji Carity, telefonowe čisło (0 35 78) 49 82 88.

Póstny wopor młodžiny

Skedźbnić chcemy na lětuši póstny wopor młodžiny, z kotrymž ma so wudaće křescanskeje literatury w Litawskej podpěrać. Wotpowědne wobalki nańdžeće w cyrkwjach.

Nócne modlenje

Nócne modlenje dekanatneje młodžiny je sobotu, 24. měrca, w Radworju. Započatk je w 20 hodź. Wšitcy młodostni su wutrobnje přeprošeni.

Putniskej jězbje do Fuldy a Wilny

Cil třidnjowskeje putniskeje jězby je tónraz Fulda, hdžež wopytamy row swjateho Bonifacija. Jězba z busom wotměje so wot srjedy, 30. meje, do pjatka, 1. junija. Přenocowanje je w klóštrje oblatow w Hünfeldze předwidžane. Tydženska jězba powjedže putnikow wot soboty do soboty, 11. do 18. awgusta, na marijanske putniske městno do Wilny w Litawskej z přebytkom w Gdańsku. Přizjewjenja přijimuje Terezija Kubašec w Radworju, telefonowe čisło (03 59 35) 2 04 25.